

佛
藏
輯
要

17

巴蜀書社

第一十七册

佛藏輯要

周紹良題



新學
解
卷
PDG

目錄

大毗盧遮那成佛經疏

一

佛說一切如來真實攝大乘現證三昧大教王經

三六三

般若波羅蜜多理趣品

六〇八

大樂金剛不空真實三昧耶經般若波羅蜜多理趣釋

六一三

金剛頂瑜伽中發阿耨多羅三藐三菩提心論

六三一

受菩提心戒儀

六三五

蘇悉地羯羅經

六三八

大毗盧遮那成佛經疏目錄

卷第一 入真言門住心品第一

卷第二 入真言門住心品第一之餘

卷第三 入真言門住心品第一之餘 入漫荼羅具緣真言品第二

卷第四 入漫荼羅具緣真言品第二之餘

卷第五 入漫荼羅具緣品之餘

卷第六 入漫荼羅具緣品第二之餘

卷第七 入漫荼羅具緣品第二之餘

卷第八 入漫荼羅具緣品第二之餘

卷第九 入漫荼羅具緣品第二之餘 息障品第三

卷第十 息障品第三之餘 普通真言藏品第四 世間成就品第五

卷第十一 悉地出現品第六

卷第十二 悉地出現品第六之餘 成就悉地品第七 轉字輪漫荼羅行品第八

卷第十三 轉字輪漫荼羅行品第八之餘 密印品第九

卷第十四 密印品第九之餘 字輪品第十 祕密漫荼羅品第十一

卷第十五 祕密漫荼羅品第十一之餘

卷第十六 祕密漫荼羅品第十一之餘 入祕密漫荼羅品第十二 入祕密漫荼羅位品第十三

卷第十七 次祕密八印品第十四 次持明禁戒品第十五 次阿闍梨真實智品第十六 布字品第十七

次受方便學處品第十八

受方便學處品第十八之餘 次百字生品第十九 百字果相應品第二十

卷第十九

次百字位成品第二十一 次百字成就持誦品第二十二 次百字眞言法品第二十三 次菩

卷第二十

提性品第二十四 次三三昧耶行品第二十五 次明如來品第二十六 次護摩品第二十七 世出世護摩法品第二十七之餘 次本尊三昧品第二十八 次無相三昧品第二十九 次世

出世持誦品第三十 次囑累品第三十一

大毗盧遮那成佛經疏目錄終

大毗盧遮那成佛經疏卷第一

沙門一行阿闍梨記

入眞言門住心品第一

大毗盧遮那成佛神變加持者。梵音毗盧遮那者。是日之別名。卽除暗遍明之義也。然世間日則有方分。若照其外不能及內。明在一邊不至一邊。又唯在晝光不燭夜。如來智慧日光則不如是。遍一切處作大照明矣。無有內外方所晝夜之別。復次日行闔浮提一切卉木叢林隨其性分各得增長。世間衆務因之得成。如來日光遍照法界亦能平等開發無量衆生種種善根。乃至世間出世間殊勝事業莫不由之而得成辦。又如重陰昏蔽日輪隱沒亦非壞滅猛風吹雲日光顯照亦非始生佛心之日亦復如是。雖爲無明煩惱戲論重雲之所覆障而無所滅。究竟諸法實相三昧圓明無際而無所增。以如是等種種因緣世間之日不可爲喻。但取其少分相似故加以大名曰摩訶毗盧遮那也。成佛者具足梵音應云成三菩提。是正覺正知義。謂以如實智知過去未來現在衆生數非衆生數有常無常等一切諸法皆了了覺知故名爲覺。而佛卽是覺者。故就省文但云成佛也。神變加持者。舊譯或云神力所持。或云佛所護念。然此自證三菩提提出過一切心地現覺諸法本初不生是處言語盡竟心行亦寂。若離如來威神之力則雖十地菩薩尙非其境界。況餘生死中人爾時世尊往昔大悲願故而作是念。若我但住如是境界則諸有情不能以是蒙益。是故住於自在神力加持三昧。爲一切衆生示種種諸趣所意見身說種種性欲所宜聞法。隨種種心行開觀照門。然此應化非

從毗盧遮那身或語或意生於一切時處起滅邊際俱不可得譬如幻師以呪術力加持藥草能現種種未曾有事五情所對悅可衆心若捨加持然後隱沒如來金剛之幻亦復如是緣謝則滅機興則生即事而真無有終盡故曰神力加持經若據梵本應具題云大廣博經因陀羅王因陀羅王者帝釋也言此經是一切如來祕要之藏於大乘衆教威德特尊猶如千目爲釋天主今恐經題太廣故不具存入真言門住心品者梵本具有二題初云修真言行品次云入真言門住心品竊謂入住之義以兼修行故離煩文但著其一真言梵曰漫怛攞即是眞語如語不妄不異之音龍樹釋論謂之祕密号舊譯云呪非正翻也此品統論經之大意所謂衆生自心品即是一切智智如實了知名爲一切智者是故此教諸菩薩眞語爲門自心發菩提即心具万行見心正等覺證心大涅槃發起心方便嚴淨心佛國從因至果皆以無所住而住其心故曰入真言門住心品也入真言門略有三事一者身密門二者語密門三者心密門是事下當廣說行者以此三方便自淨三業即爲如來三密之所加持乃至能於此生滿足地波羅蜜不復經歷劫數備修諸對治行故大品云或有菩薩初發心時即上菩薩位得不退轉或有初發心時即得無上菩提便轉法輪龍樹以爲如人遠行乘羊去者久久乃到馬則差速若乘神通人於發意頃便至所詣不得云發意間云何得到神通相爾不應生疑則此經深旨也經云如是我聞一時薄伽梵住如來加持法界宮者經初五義如智度中廣明然此經梵本闕無通序阿闍梨云毗盧遮那大本有十万偈以浩廣難持故傳法聖者採其宗要凡三千餘頌雖眞言行法文義略周以非大經正本故不題通序今以例加之於義無傷也薄伽梵者論師所解具有六義今此宗中薄伽梵是能破義如人執持利器多所摧伏其本未有此名世議觀其事迹故号爲能破者世尊亦爾以大智明破一切識心無明煩惱此等本自無生亦無相貌然慧日出時暗惑自除是故義名爲破釋論亦云婆伽名破婆名能破姪怒癡故名婆伽婆二乘雖破三毒亦不了了盡如盛香器餘氣故在又如草木薪火以力薄故灰炭不盡如來如劫燒火一切都盡無烟無炭故名婆伽婆復次帝釋聲論謂女人爲薄伽是欲求因緣能息煩惱義又是所從生義金剛頂宗即翻此義云女人者即是般若佛母無礙知見人皆悉從是生其有志求因緣得與相應煩惱戲論皆悉永息非如世間欲熱雖小止息而實更增也以密教不可直宣故多有如是隱語學者當觸類思之又薄伽梵者即帶有聲如入多有資財名持資

財者。以有金故名持金者。以如來具殊勝德故名持衆德者。釋論亦云。婆伽言德。婆者言有是名有德。婆伽名名聲。婆者言有是名有名聲。一切世間無有德名聲如佛者。則其義也。經中多譯爲世尊。是歎德之。摠稱西方語法。言及尊者。不敢直斥其名。必先歎其功德。如云大智舍利弗。神通目捷。連頭陀大迦葉。持律優波離等。故此經中例云薄伽梵毗盧遮那。今順此方文勢。或以世尊居下也。經云薄伽梵住如來加持者。薄伽梵卽毗盧遮那本地法身。次云如來是佛。加持身。其所住處名佛受用身。卽以此身爲佛加持住處。如來心王諸佛住而住其中。旣從遍一切處加持力生。卽與無相法身無二無別。而以自在神力令一切衆生見身密之色。聞語密之聲。悟意密之法。隨其根性種種不同。卽此所住名加持處也。次又釋歎加持住處。故云廣大金剛法界宮。大謂無邊際。故廣謂不可數量。故名金剛。如世間金剛寶。有一切語言心行道。適無所依。不示諸法。無初中後不盡不壞。離諸過罪。不可變易。不可破毀。故名金剛。如世間金剛寶。有三事最勝。一者不可壞。故二者寶中之上。故三者戰具中勝。故此與釋論三種金剛三昧中喻。意大同。法界者。廣大金剛智體也。此智體者。所謂如來實相智身。以加持故。卽是真實功德所莊嚴處。妙住之境。心王所都。故曰宮也。此宮是古佛成菩提處。所謂摩醯首羅天宮。釋論云。第四禪五種那含住處名淨居天。過是以往。有十住菩薩住處。亦名淨居。号曰大自在天王是也。今此宗明義。以自在加持神心所宅故名曰自在天王宮也。謂隨如來有應之處。無非此宮。不獨在三界之表也。一切持金剛者皆悉集會。次明妙眷屬也。如來在此宮中爲獨處。耶有眷屬乎。故云此中乃有無邊眷屬。常所集會。所謂執金剛等也。梵云伐折羅陀羅。此伐折羅卽是金剛杵。陀羅是執持義。故舊譯云執金剛。今謂持金剛兼得深淺二釋。於義爲勝。故隨文便互爲其辭。若世諦常途所表。則云生身佛常有五百執金剛神。翌從侍衛。然此宗密意。伐折羅是如來金剛智印。如是智印其數無量。能持此者亦復無邊。所以然者。心王所住之處必有塵沙心數。以爲眷屬。今者心王毗盧遮那成自然覺。爾時一切心數無不卽入金剛界中。成如來內證功德差別智印。如是智印。唯佛與佛乃能持之。約菩提義卽有無量無邊金剛印。約佛陀義卽有無量無邊持金剛者。由此衆德悉皆一相一味。到於實際。故名集會。若少分未等一法未滿。卽不名一切集會也。然以自在神力所加持故。卽從心王毗盧遮那現加持尊特身。爾時無量法門眷屬。一一皆現執金剛身。顯發如來威猛大勢。譬如帝釋手執金剛。破修羅軍。今此諸執金

剛亦復如是。各從一門持大空之戰具。能壞衆生無相之煩惱。故以相況也。如來信解遊戲神變生大樓閣寶王。高無中邊。諸大妙寶王種種間飾菩薩之身爲師子座者。大衆已集。應有說法處。故次明所住樓閣及師子座也。信解者。始從真正發心乃至成佛。於是中間通名信解地。梵云微吃哩拏多。是踴躍義。遊戲義。神變義。謂從初發心以來深種善根。起種種願行莊嚴佛土。成就衆生恒殊勝進不休息。故即是超昇騰躍義。如人掉動鼓舞。能以善巧三業普悅衆心。故此騰躍即名遊戲。如是遊戲即是菩薩自在神通言。毘盧遮那本行菩薩道時。以一體速疾力三昧供養無量善知識。遍行無量諸度門。自利利他法皆具足。能得如是如來智寶之所集成。祕密莊嚴法界樓觀於一切實報所生最爲第一。猶如眞陀摩尼爲諸寶之王。故曰遊戲神變生大樓閣寶王也。其高無窮。當知廣亦無際。以邊不可得。故亦復無中。此是遍一切處身之所住處。當知如是樓觀亦遍一切處也。次明樓觀莊嚴之相。猶如有人以種種雜色金剛嚴飾金剛。然其體性無有差別。今亦如是。還以如來種種功德寶王間飾樓閣寶王。何以故。更無有法出如是寶性。故然此第一寂滅之相。以如來加持神力令應度者隨諸法門表像。若可見聞觸知。即以此爲門而入法界。如善財童子入彌勒宮殿因緣。此中應廣明菩薩之身爲師子座者。上說金剛法界宮。即是如來身。次云大樓閣寶王。亦即是如來身。今云師子座。當知亦爾。所以云菩薩身者。謂本行菩薩道時。次第修行地波羅蜜。乃至第十一地。當知後地。即以前地爲基。故云如來以菩薩身爲師子座。釋論云。譬如師子於衆獸中獨步無畏。佛亦如是。於九十六種外道中一切降伏無畏。故名人中師子。其所坐處若牀若地。皆名師子座。今此宗明義言師子者。即是勇健菩提心。從初發意以來得精進大勢。無有怯弱。猶如師子隨所執縛。必獲無遺。即是自在度人無空過義也。若淺略釋者。言諸菩薩深心敬法。乃至以身荷戴佛師子座。故曰菩薩之身爲師子座也。其金剛名曰虛空無垢執金剛。乃至金剛手祕密主。如是上首十佛刹微塵數等持金剛衆俱。及普賢菩薩慈氏菩薩妙吉祥菩薩除一切蓋障菩薩等。諸大菩薩前後圍繞而演說法者。次明同聞衆也。問曰。佛所說經何故先明住處眷屬耶。答曰。譬如國王若有政令。必先出居外朝制斷刑賞。時史著記云。某時王在某處。與某甲大臣等集議。有如是教命。欲令境內信伏行之不疑。故法王亦爾。將說大法。必於大眷屬菩薩衆中令作證明。以是因緣聞者生信。由信心故能入如是法中修行得證。倍復生信。故先列衆也。虛空無垢執金剛。

者。卽是菩提心體。離一切執。諍戲論。如淨虛空。無有障礙。無垢無染。亦無分別。如此之心。卽是金剛智印。能持此印。名虛空無垢執金剛也。復次。虛空遊步執金剛者。遊步是不住義。勝進義。神變義。以淨菩提心於一切法都無所住。而常進修。萬行起大神通。故曰。虛空遊步。復次。虛空無垢執金剛。卽阿字門平等種子。修無住行。譬如種植。方便根牙漸生。故次明發行金剛印也。第三。虛空生執金剛者。如萌芽已生。四大時節爲緣。虛空不礙念念滋長。菩提心亦復如是。以無所得爲方便。萬行爲緣。得眞實生。眞實生者。所謂大空生。故名虛空生。第四。被雜色衣執金剛者。如萌芽增長。莖葉花實漸次滋繁。菩提心樹王萬德開敷。亦復如是。故云。具種種色。復次。以種種法界色。染此無垢菩提心。成大悲漫荼羅。故名被雜色衣。第五。善行步執金剛者。此善字。梵云毗質多羅。有端嚴義。種子義。譬如已得果實。復還爲種子也。善行步者。卽是諸佛威儀。謂善知時宜。可度不可度。等種種通塞。以身口意方便。俯應羣機。曲中規矩。皆成佛事。故以爲名也。第六。住一切法平等執金剛者。謂住一切佛平等性也。謂因果自他有爲無爲等一切諸法。入此如實智中。究竟平等。同一實際。能持此智印。故以爲名也。然上來五句。亦皆是如來眞實功德。無深淺之殊。爲欲分別令易解。故作次第說耳。第七。哀愍無量衆生執金剛者。此哀愍亦名救度。謂已住平等法性。自然於一切衆生發同體悲愍之心。諸衆生界無量。故如是大悲亦無限量。此是如來一功德。故能持者。因以爲名。第八。那羅延力執金剛者。已發哀愍之心。若具大勢。則能救護。故次明也。經中校量六十象力。不如一香象力。乃至末後那羅延力。最勝佛生身一一毛孔皆等。那羅延力。故以喻法界身。那羅延力。第九。大那羅延力執金剛者。謂持祕密神通力也。如一闍提必死之疾。二乘實際作證已死之人。諸佛醫王明見如來性故。則能必定師子吼於救療。因緣心不怯弱。諸菩薩尙不能爾。故復明不共一切摩訶那羅延力。第十。妙執金剛者。妙名更無等比。更無過上義。猶如醍醐融妙已極。不可復增。常不變易。無間無雜。如來亦爾。一切功德悉皆無比。無上諸有所作。亦唯爲此一事。因緣故名妙執金剛。第十一。勝迅執金剛者。勝謂大空大空卽是遍一切處。故能起速疾神通也。住此乘者。初發心時卽成正覺。不動生死而至涅槃。故名勝迅。第十二。無垢執金剛者。卽是離一切障。菩提心也。譬如眞金體性純淨。若種種鍊冶衆寶磨瑩。倍復光明。則知初質尙與微垢共住。能持此畢竟淨金剛印。因以爲名。十三。刃迅執金剛者。此刃字。梵文是忿中之忿。利中之利。義翻猶如刀刃也。持此金

剛利智一切難斷處悉斷難滅處悉滅故以爲名十四如來甲執金剛者如來甲所謂大慈由此嚴身故攝護衆生施作佛事不爲一切煩惱所傷無能降伏沮壞之者故以爲名十五如來句生執金剛者句名住處即大空生諸佛自證功德從如來性生此加持身從如來自證功德生以不離阿字門故名如來句生十六住無戲論執金剛者所謂住大空慧也謂觀緣起實相無生無滅不斷不常亦非去來一異是處諸戲論息法如涅槃持如是智印故得以爲名也十七如來十力生執金剛者謂佛方便智如是妙權從何處生謂從如來十智力生持如是印故得以爲名也十八無垢眼執金剛者卽如來五眼以菩提心畢竟淨故以一切種觀一切法了了見聞覺知無所罣礙能持如是金剛印故以爲名十九金剛手祕密主者梵云播尼卽是手掌掌持金剛與手執義同故經中二名互出也西方謂夜叉爲祕密以其身口意速疾隱祕難可了知故舊翻或云密迹若淺略明義祕密主卽是夜叉王也執金剛杵常侍衛佛故曰金剛手然是中深義言夜叉者卽是如來身語意密唯佛與佛乃能知之乃至彌勒菩薩等猶於如是祕密神通力所不及祕中最祕所謂心密之主故曰祕密主能持此印故云執金剛也如是上首十佛刹微塵數等持金剛衆俱者若具存梵本於列名下一一皆有多聲應云虛空無垢等虛空遊步等乃至祕密主等所以然者此等上首執金剛一一皆有無量眷屬部類大本當具存耳然統其綱要則枝末隨之於宗通之用不足爲闕所云十佛刹微塵數者如來差別智印其數無量非等數譬喻之所能知且以如來十種智力各對一佛刹微塵以表衆會之數世界海世界性及一佛刹義如釋論中廣明然此毗盧遮那內證之德以加持故從一一智印各現執金剛身形色性類皆有表象各隨本緣性欲引攝衆生若諸行人懇懃修習能令三業同於本尊從此一門得入法界卽是普入一切法界門也次列菩薩衆以四聖者而爲上首前明諸執金剛一向是如來智印今此菩薩義兼定慧又兼慈悲故別受名也亦是毗盧遮那內證功德如執金剛有十佛刹微塵衆當知諸菩薩法門相對亦有十佛刹微塵衆以加持故各得從法界一門現爲一善知識身也又般若釋論生身佛成道時阿難密迹力士等是名內眷屬舍利弗目犍連等諸聖人及彌勒文殊諸阿毗跋致一生補處菩薩等是名大眷屬今謂佛加持身亦復如是諸執金剛各持如來密印名內眷屬諸菩薩大悲方便普門攝受無量衆生輔佐法王行如來事名大眷屬故大品云欲爲諸佛內眷屬欲得大眷屬者當學般若波羅蜜也

普賢菩薩者。普是遍一切處。義賢是最妙善義。謂菩提心所起願行及身口意。悉皆平等遍一切處。純一妙善。備具衆德。故以爲名。慈氏菩薩者。謂佛四無量心。今以慈爲稱首。此慈從如來種姓中生。能令一切世間不斷佛家。故曰慈氏。上云普賢是自證之德。本願已滿。欲化衆生。令得此道。故次明之。妙吉祥菩薩者。妙謂佛無上慧。猶如醍醐。純淨第一。室利翻爲吉祥。卽是具衆德義。或云妙德亦云妙音也。言以大慈悲力。故演妙法音。令一切聞。故次彌勒明之。除一切蓋障菩薩者。謂障爲衆生種種心垢。能翳如來淨眼。不能開明。若以無分別法。滅諸戲論。如雲霧消除。日輪顯照。故云除蓋障。如來諸有所作。悉皆爲此一事。因緣故。次妙音明之。復次行人。雖學般若。若波羅蜜。若無禪定。猶如盲者。雖遇日光。無所能爲。故次文殊妙慧。明除蓋障三昧也。此四菩薩。卽是佛身四德。有所偏闕。則不能成。無上菩提。是故列爲上首。以統塵沙衆德。諸大菩薩者。具出梵文。應云摩訶菩提薩埵。釋論云。菩提名諸佛道。薩埵名衆生。或名勇心。是人盡欲得諸佛功德。其心不可斷。不可破。如金剛山。是名薩埵。復次此人心能爲大事。不退不轉。大勇心。故多衆生中起大慈悲。成立大乘。能行大道。得最大處。故必能說法。破一切衆生大邪見。大愛大我心。等諸煩惱。故名爲摩訶薩埵。阿闍梨云。具據正義。當云菩提索多。此索多者是忍樂修行。堅持不捨義也。然聲明有如是法。若論文字。其義雖正。音韻或不流便者。得取便安之。故世論師謂爲薩埵。傳習者隨順其辭。就瑜伽宗者。薩埵略有三種。一者愚童薩埵。謂六道凡夫。不知實諦。因果心行邪道。修習苦因。戀著三界。堅執不捨。故以爲名。二者有識薩埵。卽二乘也。纔覺知生死過患。自求出離。得至涅槃。著保化城。與滅度想。於如來功德。未生願樂之心。故以爲名。三者菩提薩埵。無上菩提。出過一切臆度。戲論種種過失。是一向純善白淨微妙。不可譬類之義。卽是衆生本性。不思議心也。能忍如是成道事。願樂修行。堅固不動。故名菩提索多。於如是人中。功業最大。堪能轉授一切衆生。故名爲摩訶薩埵。此等大衆。前後圍遶。大日世尊。以無量身口意。供養恭敬。爲聽法。故次明羣機嘉會之時。所同聞法。卽經所謂越三時如來之日。加持故。身語意平等。句法門也。然此經流布。闡浮提略。有十萬偈。若十物剎微塵大衆。各各廣演。身口意差別法門。則無限量。此說法時。分復當云何。故結集者云。爾時住於佛日。而演說法者也。如世間時分。則有過去未來現在。長短劫量。種種不同。且約日行四天下。一周晝夜。各有初中後分。乃至卅時等。剎那不住。代謝相推。以淨眼觀之。三際之相。了不可得。無終無始。亦

無去來。卽此實相之日。圓明常住。湛若虛空。無有時分修短之異。然以佛神力故。令瑜伽行者。於無量劫。謂如食項。或演食項。以爲無量劫。延促自在。咸適衆機。無定相可得。故云如來日也。如此時中佛說何法。卽是身語意三平等句法。門言如來種種三業。皆至第一實際妙極之境。身等於語。語等於心。猶如大海遍一切處。同一鹹味。故云平等也。句者梵云鉢曇。正翻爲足。聲論是進行義。住處義。如人進步舉足下足。其迹所住處。謂之鉢曇。言辭句逗義。亦如是。故同一名耳。今就此宗。謂修如是道迹次第進修。得住三平等處。故名爲句。卽以平等身口意祕密加持。爲所入門。謂以身平等之密印。語平等之眞言。心平等之妙觀。爲方便。故逮見加持受用身。如是加持受用身。卽是毗盧遮那遍一切身。遍一切身者。卽是行者平等智身。是故住此乘者。以不行而行。以不到而到。而名爲平等句。一切衆生皆入其中。而實無能入者。無所入處。故名平等平等法門。則此經之大意也。時彼菩薩普賢爲上首。諸執金剛祕密主爲上首。毗盧遮那如來加持。故奮迅示現身無盡莊嚴藏。乃至有情類業壽種除復有牙種生起者。謂將說此平等法門。故先以自在加持感動大衆。悉現普門境界。祕密莊嚴。不可思議。未曾有事。因彼疑問而演說之。則聞者信樂倍增。深入語義。如法華序分。從地涌出品。因緣。此中當廣說之。復次普賢祕密主等上首諸仁者。卽是毗盧遮那差別智身。於如是境界久已通達。然此諸解脫門。所現諸善知識。各引無量當機衆。同入法界漫荼羅。爲饒益此初入法門實行諸菩薩故。如來加持奮迅示現大神通力也。如師子王將欲震吼。必先奮迅其身。呈現材力。然後發聲。如來亦爾。將欲必定師子吼宣說一切智門。故先奮迅示現無盡莊嚴藏。所謂莊嚴者。謂從一平等身。普現一切威儀。如是威儀。無非密印。從一平等語。普現一切音聲。如是音聲。無非眞言。從一平等心。普現一切本尊。如是本尊。無非三昧。然此一一三業差別之相。皆無邊際。不可度量。故名無盡莊嚴也。如來祕密慧經云。除蓋障菩薩。於法會中。欲知佛身量。故令大目犍連尋之。目連上至梵宮。猶覩如來。若對目前。佛身威儀說法音聲。與本無異。乃至盡其神力。往詣他方。佛土亦不異。梵宮爾時除蓋障菩薩。及以目連不能測。故卽自往觀察。過十方各如恒河沙世界。皆見如來不起于座而演說法。乃至周極十方。盡其神通勢力。亦復如是。然後還歸。方見除疑天女去佛不遠。見入於三昧。便作是念。我聞此天女通達無量三昧門。我當觀之。今住何定也。又盡心力觀之。不測其心所行之處。聚集無量天鼓。一一皆如須彌山王。以神力同時發聲。欲令出

定而不能得。乃至佛言。我未發菩提心時。是天女已能住此三昧。即是無邊際義也。如是毗盧遮那。普於十方一切世界。一一皆現佛加持身。是一一身。各有十佛刹微塵數等。菩薩金剛大衆。此諸大衆諸根相好。亦復無邊如胡麻油遍滿法界。於中無空隙處。又如國王有大庫藏。若須示人。則自在開發而陳布之。故曰莊嚴藏也。復次此諸大衆。但以佛威神力。故得見如是不思議境界。如來若捨加持。即不現前。非其自心限量之所能及。如行者內修般舟三昧。外蒙神力護持。能以父母生身見十方佛。如晴夜無雲。仰觀衆星。聽聞法音。了了無礙。然此境界。由行者心淨。故生耶。由佛加被。故生耶。若由內心。即是從自性生。若由佛力。即是從他性生。悉皆不異。外道論義。以自他無故。和合亦無。又復非無。因緣而得成就。何以故。內因外緣。隨有所闕。即不現前。故當知如是莊嚴之相。顯時無所從來。隱時亦無所去。畢竟平等。不出於如故。經云。非從毗盧遮那佛身。或語或意生。一切處起。滅邊際不可得。而毗盧遮那一切身業。一切語業。一切意業。一切處。一切時。於有情界。宣說眞言道句。法此轉釋佛莊嚴藏。所以無盡無邊際者。以不異如來遍一切處。常住不滅之身也。雖常無起滅。而能以一切三業。普於十方三世一切時處。說最實道。教化群生。軌匠其心。令至佛道。經云。又現執金剛。普賢蓮華手菩薩等像。普於十方宣說眞言道。清淨句法。所謂初發心。乃至十地。次第此生。滿足緣業。生增長有情類業。壽種除。復有牙種生起者。又廣前相。言非但示現佛身。充滿十方一切世界。所現金剛菩薩等身。亦復遍一切處也。且如十佛刹微塵數諸執金剛菩薩等身。口心印差別不同。如是一一本尊像。類眷屬。皆如毗盧遮那。充滿十方一切世界。如因陀羅網。互不相妨。今略舉三聖者。以爲稱首也。執金剛對金剛智慧門。降伏方便。普賢對如如法身門。寂災方便。觀音對蓮華三昧門。增益方便。舉此三點。則無量不思議妙用。皆已攝在其中。故特言之。所云等者。乃至諸天八部五通神仙。以外現漫荼羅之所表示。例可知也。如是等種種因緣無數方便。普門應現。教化群生。雖深淺不同。蟲細有異。然究其實事。無非祕密加持。各能開示如來清淨知見。若離如是實相印。餘皆愛見法生。與天魔外道作諸營侶。豈得名爲清淨句義耶。次又釋言所謂清淨句者。即是頓覺成佛神通乘也。如餘乘菩薩志求無上菩提。種種勤苦。不惜身命。經無數阿僧祇劫。或有成佛。或不成佛者。今此眞言門菩薩。若能不虧法則。方便修行。乃至於此生中。遽見無盡莊嚴加持境界。非但現前而已。若欲超昇佛地。即同大日如來。亦可致也。復次行者初發心時得。

入阿字門。即是從如來金剛性生牙。當知此牙一生運運增進。更無退義。乃至成菩提。無行可增。然後停息。故云次第。此生滿足。此中次第者。梵音有不住義。精進義。遍行義。謂初發心。欲入菩薩位。故於此真言法要。方便修行。得至初地。爾時以無所住。進心不息。爲滿第二地。故復依真言法要。方便修行。得至第三地。爾時以無所住。進心不息。爲滿第四地。故復依真言法要。方便修行。得入五地。如是次第。乃至滿足十地。唯以一行一道。而成正覺。若於異方便門。開顯密意。亦皆不離如是寶乘也。緣業生者。謂爲有情癡愛。因緣造身口意種種虛妄。不清淨業。乘如是業生六趣身。增長輪迴。備受諸苦。今修平等三業。清淨慧門。一切蘊阿賴耶業壽種子。皆悉焚滅。得至虛空無垢大菩提心。一切如來平等種子。從悲藏中生法性牙。乃至莖葉花果。遍滿諸法界。成萬德。開敷菩提樹王。然以四不生義。觀之都無所起。亦無起處。當知此生。即是大空生也。故云有情類業壽種。除復有牙種生起。復次如來所現十佛剎微塵數等諸善知識。及法界門。假令次第觀聽。則無量無邊阿僧祇劫。不可周遍。以佛日加持。故於會坐之頃。皆悉現前。即是將說此經。示不可思議神通瑞相也。如文殊師利。親見白毫所照。萬八千土。諸菩薩種種因緣。皆是行菩薩道。卽知諸佛將欲開權顯實。說法華經。當知金剛手等。亦復如是。普見加持世界。唯說平等法門。卽知如來將演遍一切乘。自心成佛之教。故下文所問。乘此而生也。爾時執金剛祕密主。於彼衆會中。坐白佛言。世尊。云何如來應供。正遍知。得一切智智。乃至如是智慧。以何爲因。云何爲根。云何究竟者。如來自證之智。設以神力加持。亦不可示人。前云奮迅。示現無盡莊嚴藏者。皆外用之迹耳。智者見其條末。則喻其宗本。如觀象迹。超絕衆羣。其所躋踐。倍復深廣。雖不覩其形。當知此象身力必大。又如迅雷。樹雨能令鳥獸震死。百川奔湧。懷山襄陵。雖不測其本。當知此龍威勢必大。今諸大衆。亦復如是。以觀如來。無盡身口意。能一時普應法界衆生。妙合根宜。曲成佛事。則知如來知力。必於一念普鑒羣機。本末因緣。究竟無礙。照俗之權。尙爾。其契實之境。界當復云何。若法不然。則有微迹可尋。我已盡覩。然不知是法從何得之。故執金剛手。因衆會疑心。而問佛言。云何如來應供。正遍知。得此一切智智也。梵本云。但 he 揭多者。但 he 是如義。揭多是來義。知解義。說義去義。如諸佛乘如實道。來成正覺。今佛亦如是來。故名如來。一切諸佛。如法實相知解。知已。亦如諸法實相。爲衆生說。今佛亦如是。故名如實知者。亦名如實說者。一切諸佛。得如是安樂性。直至涅槃中。今佛亦如是去。故名如去。釋論具

含四義。然古譯多云如來有部戒本云如去。阿闍梨意存如去。如說。今且順古題也。梵本云阿羅訶者。阿羅是煩惱。訶是害義。除義。釋論謂之殺賊。佛以忍進鎧甲。乘持戒之馬。定弓慧箭。外破魔王軍。內滅煩惱賊。故以爲名。又阿名爲不羅。訶名生。謂佛心種子。後世田中不生矣。無明殼皮脫。故復次阿羅訶。是應受供養義。以有如是功德。故應受天人最上供養。故以爲名也。梵本云三藐三佛陀者。三藐名正。三名遍。佛陀名知。故曰正遍知也。釋論云。若有人言。何以故。但佛如實說。如來如去。故應受最上供養耶。以佛得正遍智慧。故正名諸法不動不壞。相遍名不爲一法二法。故以悉知一切法無餘。是名三藐三佛陀。然此宗中。佛陀名覺。是開敷義。謂由自然智慧。遍覺一切法。如盛開敷蓮華。無有點汙。亦能開敷一切衆生。故名佛也。梵云薩婆若。那即是一切智智。釋論云。薩婆若多者。卽一切智。一切智。謂名色等無量法門。各攝一切法。如是無量三四五六等。乃至阿僧祇法門。攝一切法。是一切法中一相異相漏相非漏相作相非作相等。一切法各各相各各力各各因緣各各果報各各性各各得各各失。一切智慧力。故一切世一切種盡遍知解。是名薩婆若。今謂一切智智。卽是智中之智也。非但以一切種遍知一切法。亦知是法究竟實際。常不壞相。不增不減。猶如金剛。如是自證之境。說者無言觀者無見。不同手中奄摩勒果。可轉授他人也。若可以言語授人者。釋迦菩薩蒙定光授決之時。卽應成佛。何故具修方便。要待無師自覺。方名佛耶。又如目覩世人爲刀杖所傷。雖復信其受苦。無可疑惑。然種種令說終不證知。若自身觸受。乃得明了耳。問意言云。何令我等逮得如是自覺之慧。云。何得此慧。已能爲無量衆生廣演分布。種種趣種種性。欲種種方便道。宣說一切智智。所謂安立無量乘。示現無量身。各各同彼言音。住彼威儀。而此一切智道。猶同一味。所謂如來解脫味。此妙方便。復云何而得也。此中種種趣者。梵云娜衍亦名爲行。亦名爲道。下云大乘道等義同也。毗婆沙說有五道。摩訶衍人多說六道。如是廣衍。乃至此世界中已有卅六俱胝衆生趣。何況十方一切世界耶。性欲者。欲名信惠好樂。如孫陀羅難陀好五欲。提婆達多。好名聞等。乃至諸得道人。亦各有所好。大迦葉好頭陀。舍利弗好智慧。離波多。好坐禪。優婆離。好知毗尼。阿難。好多聞等。當廣說之。性名積習相從。性生欲隨性作行。或時從欲爲性。習欲成性。性名染心。染心爲事。欲名隨緣起。是事釋論中具明。種種方便道者。龍樹云。般若與方便本體是一。而所用有異。譬如金師以巧方便。故以金作種種異物。雖皆是金。而各異名。今毗盧遮那亦復如是。

能以遍一切處真金智體造種種乘。復次此中間意即是發起大悲胎藏漫荼羅也。於薩婆若平等心地畫作諸佛菩薩。乃至二乘八部等四重法界圓壇。此一本尊身語心印皆是一種差別乘也。且如有人志求五通智道。即從大悲胎藏現章陀梵志形爲說瞿曇仙等眞言行法行者精勤不久。成此仙身更轉方便。即成毗盧遮那身也。如是或現佛身說種種乘。乃至現非人身說種種乘。隨類形聲悉是眞言密印。或久或近。無非毒鼓因緣。故經云皆同一味。所謂如來解脫味也。所以然者。一切衆生色心實相。從本際已來。常是毗盧遮那平等智身。非是得菩提時。強空諸法。便成法界也。佛從平等心地開發無盡莊嚴藏大漫荼羅。已還用開發衆生平等心地。無盡莊嚴藏大漫荼羅。妙感妙應。皆不出阿字門。當知感應因緣所生方便。亦復不出阿字門。譬如大海中波濤相激迭爲能所。然亦皆同一味。所謂鹹味也。復次執金剛承佛神力。爲欲發起大悲胎藏祕密方便。故復說五種譬喻。所謂虛空地水火風也。初句云譬如虛空界。離一切分別。無分別。無無分別。如是一切智智。離一切分別。無分別。無無分別者。如此即是毗婆沙義。虛空無過無德。今如來智身。離一切過。萬德成就。云何得相喻耶。但取其少分相似。以況大空耳。此中相況有三義。一者虛空畢竟淨。故二者無邊際。故三者無分別。故一切智心性亦如是。故以世間易解空。譬難解空也。初云離一切分別。梵云劫跋次云無分別者。梵云劫跋夜帝。所以重言是分別之上。更生分別義。例如尋伺略觀時名。尋諦察名伺。又如眼識生時。有蟲分別。次意識生。是細分別。舊譯或云以劫跋爲妄執。喻意云猶如虛空以無妄執分別。故無分別亦無無分別也。又如虛空離種種顯形色相。無所造作。而能含容萬像。一切草木因之生長。有情事業依之得成。佛智虛空亦復如是。雖離一切相。常無分別。起作而無量度門。種種妙業皆得成辦。故以爲喻也。第二句云譬如大地。一切衆生依如是一切智智。天人阿脩羅依者。如世間百穀衆藥卉木叢林。隨其性分無量差別。皆從大地而生根牙。乃至莖葉花果次第成就。爲一切衆生作依止處。而養育之。亦不作是念。我今荷負一切世間。不念恩德。無有勞倦。增之不喜。減之不憂。深廣離測。不可傾動。一切智地亦復如是。大悲漫荼羅一切種子之所出生。即此諸乘無量事業所依止處。於生死涅槃其心平等。世間八風不能動搖。以如是等少分相似。故以爲喻也。第三句云譬如火界。燒一切薪。無有厭足。如是。一切智智。燒一切無智薪。無厭足者。譬如火種。假使積薪充滿世界。皆如須彌山王。次第焚之。無有怯弱。不作是念。我當燒爾。

所薪不燒爾所薪熾然不息勝進無厭。要所焚盡已。然後隨滅。如來智火亦復如是。燒一切戲論煩惱薪盡。乃至緣待皆盡。即此慧光亦無所依。復次如世間之火。貴賤所同用。能於暗夜而作照明。迷惑顛墜者咸得正路。又悉能成就一切諸物。如是一切智火。聖者異生平等有之。於無始大夜之中。令諸行人見如實道。次第成就一切佛法。故以爲喻也。第四句云。譬如風界除一切塵。如是一切智智。除去一切諸煩惱塵者。如大風起時。烟雲塵霧一切消除。大虛澄廓。三辰炳現。蔚蒸熱惱衆生。皆得清涼。能使卉木叢林開榮增長。亦能摧壞一切物類。又如風性遍無所依。自在旋轉。無能罣礙。如來慧風亦復如是。滌除一切障蓋煩惱遊塵。令證涅槃清涼法性。又復能令一切世出世間善法增長。摧壞無明大樹。拔其根本。而此無障礙力。都無所依。故以爲喻也。第五句云。譬如水界一切衆生依之歡樂。如是一切智智。爲諸天世人利樂者。如水大從高赴下。多所饒益。能潤草木而生華菓。又復本性清潔無垢。悉能滿足飢渴衆生。洗諸滓穢。燭除熱惱。澄深難入。不可測量。於坑塹之處。性皆平等。如來智水亦復如是。從眞法界流趣世間。潤諸等持生助道法。成大果實。利益羣生。體無煩惱。故清潔能離諸惑。故無垢。一相非異。故無濁。諸有得之。思願盡息。獲清涼定。洗除塵勞。湛寂難思。證平等性。故以爲喻也。復次金剛手說此五喻。即是發起下文五字義也。阿字門爲地。嚧字門爲水。囉字門爲火。訶字門爲風。佉字門爲空。又如世間種子。地水火風爲緣。虛空不礙。然後得生。隨闕一緣。終不增長。一切智性如來種子。亦復如是。即用一切智門五義。自爲衆緣。能至菩提常住妙果。所謂不可思議不生不滅之因緣也。金剛手觀知如來獨一法界。加持之相。心所惟忖。必知將說如是法門。故先喻其功德。發起大會生解之機。然後問佛。如是智慧以何爲因。云何爲根。云何爲究竟耶。從此已後。如來智印即定其心。廣分別說。例如彌勒菩薩。覩佛神通之瑞。即時憤憤。悱悱心有所疑。爲說是道場所得法。爲授菩提記。文殊發揮名體。指云妙法蓮華。然後如來印以實相乘機。演說令動執之徒。得離疑網。譬如春陽之始萌。種甲坼。雷風鼓動。時雨潤灑。得離孳殼。苗能出生。若無機之人。雖則遇際。會不能發起深益也。毗盧遮那佛。即告持金剛祕密主言。善哉善哉。執金剛。善哉金剛手。汝問吾如是義。汝當諦聽。極善作意。吾今說之。乃至諸法無相。謂虛空相者。以執金剛手祕密主。豫測如來加持深意。又能發起時衆作生解因緣。仰測聖心。不失機會。故重言善哉善哉。我觀一切天人沙門婆羅門。乃至淺行諸菩薩。無能於世尊前發如是問者。